

**D<sup>a</sup> ROSA-ANA PRADA QUEIPO SECRETARIA DO CONCELLO DE AMES NA PROVINCIA DA CORUÑA**

**CERTIFICO:** QUE O PLENO DESTE CONCELLO LEVOU A CABO SESIÓN ORDINARIA O DÍA 1 DE XULLO DE 2010. DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE

**ACTA DA SESIÓN ORDINARIA LEVADA A CABO POLO PLENO DO CONCELLO O DÍA 1 DE XULLO DE 2010.-**

No Salón de Sesiós da Casa do Concello de Ames, ás vinte horas e trinta minutos (20.30) do xoves 1 de xullo de 2010, réunese o Pleno do Concello en sesión ordinaria de primeira convocatoria, baixo a presidencia do Sr. alcalde don **Carlos Antonio Fernández Castro**, e coa asistencia das/os señoras/es concelleiras/os seguintes:

<b>Grupo municipal socialista</b>	<b>Grupo municipal Popular</b>	<b>Grupo municipal do BNG</b>
Patricia Conde Lois Carmen Fraga Crespo M <sup>a</sup> Isabel González Cancela José Manuel Miñones Conde Gustavo Nieto Santiago Úrsula Seijas Seoane José Varela Abeledo Francisco Villaverde Marcos	Santiago V. Amor Barreiro M <sup>a</sup> Dolores Fernández Álvarez Ramón García Argibay Emilio Martínez Carballeira Bernardo Moar Míguez Alfonso Rey López Ana Ruso Valiña	Olalla Alvite del Río Xosé M. Fernández López David Santomil Mosquera Vitor Vicente Díaz Mercedes Vidal Baamonde

Asisten a señora **interventora** dona María del Carmen Castro Louzao e o señor **tesoureiro** don Santiago González Prado.

Actúa como **secretaria** a titular da Corporación dona Rosa-Ana Prada Queipo.

O señor alcalde don **Carlos Antonio Fernández Castro** saúda a todas/os as/os presentes e da comezo a sesión ordinaria do Pleno municipal correspondente ó día 1 de xullo de 2010, indicando que esta sesión é a correspondente ao pleno ordinario de xuño, pero correspondendo a celebración deste cun festivo local (24 de xuño San Xoán), tal e como está estipulado no pleno de organización da corporación, se pasa para o primeiro xoves hábil seguinte, que resulta ser o 1 de xullo.

**A) PARA DAR CONTA:**

**Punto Primeiro.- Dar conta dos decretos ditados pola Alcaldía dende a última sesión plenaria ordinaria.**

O señor alcalde informa á Corporación que os decretos ditados pola Alcaldía dende a última sesión plenaria ordinaria estiveron a disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello, e que con ocasión da convocatoria dos plenos ordinarios o que teñen a súa disposición é o libro oficial, en papel timbrado e numerado, ademais dos duplicados existentes nos distintos departamentos do Concello.

Informa o señor alcalde que dende o decreto de convocatoria da anterior sesión plenaria ordinaria ditáronse un total de 204 decretos, sendo o decreto nº 689/2010 o correspondente á convocatoria desta sesión.

**Punto Segundo.- Dar conta do decreto de liquidación orzamento 2008.**

O señor alcalde don **Carlos Antonio Fernández Castro** informa que a través do decreto de data 24 de maio de 2010, nº 489/2010 a Alcaldía resolveu aprobar a liquidación do orzamento municipal do exercicio 2008. Dáse conta ao pleno da corporación de acordo co disposto na lexislación vixente. Informa que no día de

mañá terá lugar a sesión da comisión informativa especial de contas, convocada para o coñecemento da liquidación do orzamento 2008.

**Punto Terceiro.- Dar conta da sentenza 478/2010, ditada en apelación polo Tribunal Superior de Xustiza de Galicia, procedemento ordinario 46/2007, interposto por don XXXXX.**

Informa o señor alcalde que don XXXXX presentou recurso contra acordo plenario adoptado o día 1 de xullo de 2006, hai hoxe catro anos, reclamando unha indemnización con motivo da construción por parte do concello da depuradora de Sisalde, preto da súa casa. Pedía cerca de 600.000 euros, resolvendo esta sentenza estimar parcialmente a demanda e concederlle unha indemnización total de 38.760 euros, moi por debaixo do demandado, polo que as teses do concello, aprobadas neste pleno por unanimidade, resultaron triunfantes. A Alcaldía entende que corresponde dar conta ao pleno desta sentenza, toda vez que o acordo que motivou o recurso tamén foi plenario.

**B) PARA DELIBERACIÓN E ACORDO:**

**Punto Cuarto.- Adhesión ao Convenio de colaboración entre a AEAT e a FEMP en materia de intercambio de información tributaria e colaboración na xestión recadatoria cas entidades locais.**

O señor alcalde outorga a palabra á concelleira de Economía e Facenda dona **Patricia Conde Lois**, que introduce o asunto dicindo substancialmente que tras a adhesión no ano 2006 do concello de Ames ao convenio de colaboración para o subministro de información tributaria, dados os éxitos acadados nestes anos por este convenio, agora se propón un paso adiante, coa adhesión a un convenio que supón, ademais da subministración de información, a mellora nos mecanismos, e, colaboración na xestión recadatoria. As vantaxes que supón a adhesión están especificadas na documentación obrante no expediente, sendo destacables a xeración de liquidez, un menor custo no procedemento, e a ruptura do principio de territorialidade que ate hoxe condicionaba ao concello de Ames para actuacións de acceso a contribuíntes domiciliados fóra do termo municipal. En vista de que a adhesión a este convenio melloraría a xestión administrativa, beneficiaría aos contribuíntes e á empresa externa que xestiona a recadación municipal, posibilitando mais eficacia, se propón a súa sinatura.

O señor alcalde abre unha primeira quenda de intervencións, intervindo o concelleiro do grupo municipal do BNG don **David Santomil Mosquera** para dicir substancialmente que o seu grupo municipal vai facilitar a adhesión a este convenio por cinco motivos básicos, sendo o primeiro a colaboración interadministrativa, en segundo lugar o logro dunha administración mais eficaz e eficiente, en terceiro lugar o aforro nos procedementos de recadación executiva, en cuarto lugar o beneficio económico que supón para o concello, tan necesario nestes tempos de crise e finalmente en quinto lugar, que temos xa o aval do éxito do convenio anterior ao que o concello se adheriu no 2006.

Intervén o voceiro do grupo municipal popular don **Santiago Amor Barreiro** para dicir substancialmente que o seu grupo valora positivamente a sinatura deste convenio, pero se pregunta con estrañeza por que dende a sinatura do novo contrato coa empresa adxudicataria da recadación municipal, en decembro de 2008, se tardou tanto en propoñer esta adhesión, sendo o convenio do ano 2003. Así mesmo solicita dos técnicos resposta á pregunta de se van ser revisados os expedientes iniciados con anterioridade e que no seu momento foron fallidos, sempre e cando non prescribiran. Continúa que na comisión informativa se dixo que se informaría no pleno da persoa que sería interlocutora, e remata a súa intervención solicitándolle á señora

secretaría do concello confirmación en relación ao quórum preciso para adoptar este acordo, pois o informe de tesouraría indica maioría absoluta.

Intervén a señora secretaria do concello dona **Rosa Ana Prada Queipo** para indicar que tal e como afirma o señor tesoureiro e seguindo o criterio da anterior adhesión, o quórum necesario é de maioría absoluta.

Intervén o señor tesoureiro don **Santiago González Prado**, que informa que o departamento de tesouraría non chegou á fase final do procedemento, queda aínda por determinarse aqueles obrigados tributarios que por razóns de procedemento poden estar nesa situación, hai que facer a declaración de fallidos, véndose os que prescribiron e os que non. Este proceso de saber que débeda total hai vai levar un tempo, polo que apraza a resposta ate o momento en que se teñan todos os datos.

Intervén a concelleira de Economía e Facenda dona **Patricia Conde Lois** para dicir substancialmente en canto á sorpresa manifestada polo voceiro do grupo municipal popular pola tardanza na adhesión que xa na na exposición indicou que o convenio asinado no 2006 era un primeiro paso, o que se trae agora mellora a xestión, e se fai neste momento porque é cando se manifesta a necesidade por parte da empresa adxudicataria da xestión recadatoria. Continúa dicindo que respecto da persoa interlocutora, será a Alcaldía quen a nomeara e todo indica que será o tesoureiro, por considerarse a persoa mais apropiada porque ostenta a xefatura do servizo correspondente.

Rematadas as intervencións, o pleno da corporación, por unanimidade, adopta os seguintes acordos:

**Primeiro.-** Aprobar a adhesión ao Convenio de colaboración entre a AEAT e a FEMP en materia de intercambio de información tributaria e colaboración na xestión recadatoria cas entidades locais, asinado no mes de abril do ano 2003 entre a Axencia Estatal de Administración Tributaria e a FEMP.

**Segundo.-** Facultar ao señor alcalde presidente don Carlos Antonio Fernández Castro para cantas actuacións de trámite sexan precisas para a mellor execución do acordado.

**Punto Quinto.- Resolución de alegacións e aprobación definitiva da modificación dos Regulamentos de Funcionamento de Réxime Interior das escolas infantís municipais O Bosque e A Madalena.**

O señor alcalde don **Carlos Antonio Fernández Castro** outorga a palabra ao voceiro do grupo municipal socialista don **Francisco Villaverde Marcos**, que introduce o asunto dicindo substancialmente que na comisión correspondente celebrada o pasado día 25 de xuño se trataron as 4 alegacións presentadas polo BNG, que posteriormente presentou un voto particular, e as 3 alegacións presentadas pola CIG e o Comité de Empresa. Seguidamente da lectura as alegacións e ao ditame da comisión.

O señor alcalde abre unha primeira quenda de intervencións intervindo o concelleiro do grupo municipal do BNG don **Vítor Vicente Díaz**, o cal di que antes de entrar no debate quere primeiramente solicitar o pronunciamento da señora secretaria sobre as alegacións presentadas polo Comité de Empresa, xa que para a primeira alegación se emprega un argumento desestimatorio que sería válido para as outras dúas e sen embargo non se emprega. Tamén solicita aclaración sobre o procedemento de votación das alegacións.

Intervén a señora secretaria do concello dona **Rosa Ana Prada Queipo** para dicir: No último parágrafo do informe aparece recollido, respecto dos tres motivos das alegacións do Comité de Empresa *recordar que os textos dos Regulamentos tal e como foron aprobados na sesión plenaria de 27 de setembro de 2007 foron obxecto*

*de aprobación administrativa polo servizo de inspección nas áreas de familia e muller da Xunta de Galicia tras a súa revisión polo concello en xaneiro de 2008. A primeira das alegacións refírese a unha materia que non foi obxecto de modificación na sesión plenaria de marzo, en que se aprobou inicialmente a modificación, a segunda tamén estaba recollida na redacción do regulamento de setembro de 2007, e igualmente á terceira alegación. Con independencia de este motivo, a maiores, no informe se utilizan outras dúas argumentacións con relación á segunda e terceira alegación.*

En canto ao sistema de votación, o BNG fixo un voto particular, o primeiro que haberá que facer é tratalo, se é aceptado o ditame da comisión informativa sería modificado co contido do voto particular, e se non se acepta o voto particular se pasaría a debater o ditame da comisión.

Continúa a súa intervención o concelleiro do grupo municipal do BNG don **Vítor Vicente Díaz** preguntando con respecto ás alegacións do Comité de Empresa se a votación da resolución vai ser en conxunto, ao que a señora **secretaría** responde que si, que as alegacións resólvense todas elas xuntas, pero se o voto particular proposto polo BNG é aceptado pola corporación municipal, o que se votaría sería o ditame da comisión con esa modificación resultante do voto particular.

Continúa don **Vítor Vicente Díaz** dicindo que a modificación dos regulamentos xa se tratou na sesión plenaria de marzo, na que o BNG se abstivo. Presentadas alegacións, previa conversa con algún membro do servizo de educación e co conseguinte informe de secretaría e debate nas comisións informativas, abriuse un proceso que culmina hoxe, así, unha vez presentado un voto particular ao ditame da comisión informativa, das catro alegacións presentadas se retiran dúas á vista do informe de secretaría, e sendo estimada a cuarta alegación polo grupo municipal socialista na comisión informativa, só resta o debate correspondente á primeira, que propón a supresión de dous parágrafos do artigo 8, aos cales da lectura:

*Se en algunha convocatoria se puideran poñer á disposición dos usuarios máis prazas de comedor e merenda que as establecidas neste regulamento, será a dirección do centro a encargada de ofertar ditas prazas.*

*Aqueles usuarios/as que teñan concedida a praza de comedor ou merenda e non a utilicen diariamente, notificaráselles por escrito a perda do dereito a dita praza.*

Di que a orde de 5 de marzo de 2010 da Consellería de Traballo e Benestar, que regula o procedemento de adxudicación de prazas nas escolas infantís, non expón en ningún apartado que se perda o dereito á praza por non empregar os servizos diariamente. Manifesta que quere deixar claro que a supresión dos parágrafos anteditos non supón ningunha alteración dos regulamentos, sendo declaración de intencións que non condicionan o resto do articulado. Xa no pleno de marzo manifestou o BNG que o servizo de comedores nas escolas infantís debe ser un servizo universal que debe de estar garantido para todos os nenos que o precisen, considerando que o concello debe perseguir que así sexa.

Remata a súa intervención indicando que o satisfactorio da creación dun servizo de tanta calidade, recoñecido socialmente pola veciñanza de Ames, non é o mantemento nin a continuidade do mesmo, senón a capacidade de facelo medrar e mellorar, ampliálo e completalo, crendo o BNG que a súa proposta apunta nesa liña.

Intervén o concelleiro do grupo municipal popular don **Bernardo Moar Míguez** para dicir substancialmente que non se vai estender neste asunto, pois os regulamentos das escolas infantís municipais teñen detrás un fondo traballo por parte dos profesionais que os elaboraron. Dende o 2007, viñeron a pleno en varias ocasións, tendo sido revisados e ratificados polas entidades autonómicas correspondentes no 2008, considera que xa é hora de aprobalos. Respecto das alegacións, indica con respecto á primeira alegación do BNG que o grupo municipal popular coincide no

referente á capacidade de medrar, pero considera que é algo que xa se está facendo, ensalza a profesionalidade dos traballadores e di que a dirección dos centros está perfectamente facultada e non considera necesario retirar os parágrafos expostos, polo tanto o seu grupo municipal é partidario de desestimar a alegación. En canto á cuarta alegación, o grupo municipal popular non ten inconveniente en aprobala.

Intervén o voceiro do grupo municipal socialista don **Francisco Villaverde Marcos** que di substancialmente que o grupo de goberno mantén o ditame da comisión informativa. Considera que os comedores están medrando en todos os aspectos, mesmo incrementado o persoal da Escola Infantil Municipal O Bosque este ano coa incorporación dunha persoa nos comedores. Indica como moi importante reforzar a autonomía dos equipos directivos das escolas, que son os que han de tomar decisións nos momentos precisos.

O señor **alcalde** abre unha segunda quenda de intervencións intervindo o concelleiro do grupo municipal do BNG don **Vítor Vicente Díaz**, que manifesta que o seu grupo municipal non vai facer cabalo de batalla neste asunto, toda vez que non se trata de modificar o articulado, sendo a intención do seu grupo municipal facer expreso o traballo manifestado polo voceiro do grupo municipal socialista, que é un feito innegable, considera que se trata de aspiracións que deberían reflectirse nos regulamentos.

Intervén o concelleiro do grupo municipal popular don **Bernardo Moar Míguez** para indicar que o traballo que se leva a cabo nas escolas infantís é moi importante e de moita calidade, en concreto nos comedores escolares, que por todos é visto e que o pode ratificar porque por si mesmo como pai.

Rematadas as intervencións **sométese a votación o voto particular formulado polos concelleiros do grupo municipal do BNG** dona Mercedes Vidal Baamonde e don Vítor Vicente Díaz en relación ao asunto ditaminado pola Comisión Informativa de Educación, Cultura, Deportes, Mocidade, Servizos Sociais e Políticas de Igualdade o día 25 de xuño de 2010 sobre resolución de alegacións e aprobación definitiva da modificación dos regulamentos de funcionamento de réxime interior das escolas infantís municipais O bosque e A Madalena. Realizada a votación, o voto particular é desestimado cos votos a favor dos 5 membros do grupo municipal do BNG, os 9 votos en contra dos membros do grupo municipal socialista e a abstención dos 7 membros do grupo municipal popular.

Intervén a señora secretaria do concello dona **Rosa Ana Prada Queipo** para explicar que seguidamente se vai proceder á votación do ditame da comisión informativa, consiste en rexeitar as tres primeiras alegacións presentadas polo grupo municipal do BNG e estimar a cuarta, a referida á non presentación da declaración do IRPF, e rexeitar as tres alegacións presentadas pola CIG e o Comité de Empresa.

Rematadas as intervencións, tendo en conta os informes obrantes no expediente e o ditame da Comisión Informativa Permanente de Educación, Cultura, Deportes, Mocidade, Servizos Sociais e Políticas de Igualdade na súa reunión de 25 de xuño de 2010, e unha vez desestimado o voto particular presentado polo grupo municipal do BNG, o pleno da corporación por maioría absoluta, cos votos a favor dos 9 membros do grupo municipal socialista e dos 7 membros do grupo municipal popular e a abstención dos 5 membros do grupo municipal do BNG, adopta os seguintes acordos:

**Primeiro.-** Resolver as alegacións presentadas durante o prazo de exposición pública aos Regulamentos de Funcionamento de Réxime Interior das escolas infantís municipais O Bosque e A Madalena do seguinte xeito:

-Con respecto ás alegacións presentadas polo grupo municipal do BNG, unha vez retiradas a segunda e a terceira, desestimar a primeira e estimar a cuarta.

-Con respecto ás alegacións presentadas pola CIG e o Comité de Empresa, desestimalas.

**Segundo.-** Prestar aprobación definitiva á modificación dos Regulamentos de Funcionamento e Réxime Interior das escolas infantís municipais O Bosque e A Madalena coa redacción resultante da resolución das alegacións nos termos indicados no punto anterior, modificando o artigo 13 do seguinte xeito: no punto relativo a documentación para a matrícula: declaración da renda (para os que renovan praza) se engadirá *de non ser así, aplicaráselle o baremo mais alto*.

**Terceiro.-** Notificar o presente acordo a todos os interesados, dando traslado, xunto coa notificación, do informe de secretaría e do ditame da comisión informativa Permanente de Educación, Cultura, Deportes, Mocidade, Servizos Sociais e Políticas de Igualdade do 25 de xuño de 2010, a efectos de motivación do acordo de estimación/desestimación das alegacións presentadas.

**Cuarto.-** Facultar ao señor alcalde presidente don Carlos Antonio Fernández Castro para cantas actuacións de trámite sexan precisas para a mellor execución do acordado.

Intervén, para explicación de voto, o concelleiro do grupo municipal popular don **Vítor Vicente Díaz**, dicindo que a abstención do BNG non é abstención aos propios regulamentos, que apoian por completo, como xa manifestaron en moitas ocasións. Que volve a acontecer unha situación semellante a outras xa vividas, que o voto en paquete de todas as alegacións supón un problema á hora de estimar unhas que consideran xustas e desestimar outras que non consideran oportunas, polo que parece mais xusto acudir ao voto de abstención.

### **C) PARA CONTROL DO GOBERNO:**

#### **Punto Sexto.- Mocións:**

**a. Moción do grupo municipal popular para a remisión ó pleno do concello de Ames con periodicidade trimestral por parte do departamento de intervención dun informe do estado de execución do orzamento e dos movementos de tesourería por operacións orzamentarias independentes e auxiliares do orzamento e da súa situación.**

O señor alcalde don **Carlos Antonio Fernández Castro** outorga a palabra ao voceiro do grupo proponente da moción, don **Santiago Amor Barreiro**, que intervén para dicir que se trata dunha moción na que o grupo municipal popular pide que se remita ao pleno con periodicidade trimestral por parte do departamento de intervención un informe do estado de execución do orzamento e dos movementos de tesouraría por operacións orzamentarias independentes e auxiliares do orzamento e da súa situación. Indica que na actual lexislatura, dentro dos incalculables atrancos que padece o seu grupo municipal por parte do grupo de goberno, compre destacar un de especial relevancia, a escasa ou nula colaboración existente á hora de facer chegar toda a información que solicita o seu grupo municipal.

O artigo 23.1 da Constitución española establece como dereito fundamental das persoas o poder participar nos asuntos públicos por medio de representantes elixidos a través dos partidos políticos, tal e como establece o artigo 6 da Constitución española. Para o exercicio desta participación debe poder terse coñecemento dos asuntos a tratar ou tratados por cada un dos organismos representativos, coñecemento que se obtén mediante o acceso aos datos e información que obran nos mesmos.

O artigo 77 da Lei 7/1985 de 2 de abril, Reguladora das Bases de Réxime Local, recoñece o dereito dos concelleiros a obter do alcalde ou da comisión de goberno cantos antecedentes, datos ou informacións obren en poder dos servizos da

corporación e resulten precisos para o desenvolvemento da súa función, ratificándose esta mesma posibilidade nos artigos 14, 15 e 16 do Real Decreto 2568/1986 de 28 de novembro do Regulamento de Organización, Funcionamento e Réxime Xurídico das corporacións locais. O artigo 22.2 apartado e) da Lei de Bases de Réxime Local atribúe ao pleno a determinación dos recursos propios de carácter tributario, a aprobación e modificación dos orzamentos, a disposición de gastos en materia da súa competencia e a aprobación das contas, todo elo de acordo co disposto na Lei Reguladora das Facendas Locais.

O Real Decreto Lexislativo 2/2004 de 5 de marzo polo que se aproba o Texto Refundido da Lei Reguladora de Facendas Locais, no seu capítulo 3º artigo 207, Información periódica para o pleno da corporación di que a intervención da entidade local remitirá ao pleno da entidade, por conduto da presidencia, información da execución dos orzamentos e do movemento da tesouraría por operacións orzamentarias independentes e auxiliares do orzamento e da súa situación, nos prazos e coa periodicidade que o pleno estableza.

Por tanto este grupo municipal fai a seguinte proposta de acordo a este pleno: 1º Que os servizos económicos do concello remitan trimestralmente información da execución dos orzamentos e dos movementos de tesouraría por operacións orzamentarias independentes e auxiliares do orzamento e da súa situación. 2º Que esta información se realice nos plenos ordinarios que se celebren nos meses de abril, xullo, outubro e xaneiro. 3º Que no vindeiro pleno ordinario do mes de outubro deste ano 2010 se de esa información referida ao último trimestre do ano 2009 e do primeiro trimestre de 2010.

O señor alcalde abre unha primeira quenda de intervencións outorgando a palabra á concelleira do grupo municipal do BNG dona **Olalla Alvite del Río**, que di que tras revisar a moción e manifestarse na comisión informativa que non habería problemas para que os servizos económicos, concretamente intervención, fixeran posible o solicitado na moción, e visto o informe de intervención que se lles pasou esta mañá no que a interventora di que non existe impedimento algún para remitir esta información, tendo en conta que é un exercicio de transparencia, e ademais se trata dun cumprimento da lexislación, o BNG vai votar a favor desta moción.

Intervén a concelleira de Economía e Facenda dona **Patricia Conde Lois** para dicir que o que se propón é que os servizos de intervención faciliten unha serie de información económica, Como se di na exposición de motivos da moción existe normativa ao respecto de que así se faga chegar ao pleno. Na exposición de motivos se fala inicialmente de que un dos motivos principais da presentación da moción é a escasa información que se facilita dende o goberno municipal, concretamente que dentro dos inculcables atrancos que padecemos por parte do goberno municipal, compre destacar a escasa ou nula colaboración que existe á hora de facer chegar toda a información que solicita o grupo municipal popular. O goberno municipal non está de acordo con esta afirmación porque menten unha vez mais, e quero que conste en acta este feito, porque evidentemente dende o goberno municipal se facilita toda a información que solicitan os grupos municipais. Concretamente o grupo municipal popular solicitou numerosos escritos ao goberno municipal e todos foron contestados e informados ao respecto. Aquí teño escritos dende o ano 2007 ate o día de hoxe, todos contestados, e pediría ao voceiro que me informe de cales son esas informacións que solicitou e que a día de hoxe non lle constan. Volvo dicir que menten, e ademais o fan por escrito e dicindo que teñen atrancos á información e que non poden acceder á mesma. Mire vostede, eu aquí diante teño a información de todos os escritos que solicitou o PP e todos están contestados, un dos mais recentes, contestado o 18 de xuño e que vostedes presentaron no rexistro xeral o 16 de xuño, sobre o estudo da estrada alternativa á nacional 550. Se me remito a todo o que é de contido económico, un resumo breve, porque se non estaríamos toda a

tarde, teño que dicir que de todos os escritos que o PP solicitou foron contestados e son contestados. Un dos mais recentes en materia económica contestado o 1 de xuño de 2010, no que solicitaban o 27 de maio copia do informe nº 124/2010 emitido polo departamento de intervención do concello de Ames, se lle contesta tal e como se ordena dende a Alcaldía que de conformidade co solicitado adxunto se lle remite copia do referido informe. O 28 de maio de 2010 se contestou a unha solicitude que fixeron o 24 de maio relativa ao informe nº 206/2010 emitido polo departamento de intervención municipal, adxuntándose a copia correspondente do informe. O 27 de abril solicitaban noutro escrito a relación de facturas referentes ao servizo da revisión do contrato de limpeza viaria e xestión do punto limpo, e o escrito foi contestado e se adxuntaron os datos obrantes no departamento de intervención con data 7 de maio. Outro dos escritos presentados, con data 23 de abril, solicitan acceso ás facturas e copia da relación detallada das mesmas no referente a un asunto aprobado en pleno, a aprobación do crédito extraordinario 1/2010, así mesmo se lles facilitou a información. O 10 de febreiro de 2010 solicitan as facturas emitidas pola empresa XXXXX nos períodos anuais 2007, 2008 e 2009, se lles facilita esa información o 12 de febreiro de 2010, e o mesmo día se lles respondeu a un escrito no que solicitaron as facturas emitidas pola empresa VVVVV. O 10 de febreiro de 2010 solicitan facturas emitidas pola empresa YYYYY e se lles responde o 13 de febreiro informando que teñen acceso a esa relación detallada. O 10 de febreiro de 2010 se lles contesta que teñen diferentes accesos ás facturas reclamadas por ZZZZZ e demais. Outro escrito contestado o 4 de febreiro de 2010 onde se adxunta outro informe solicitado do departamento de intervención, o 112/2009, se lle adxunta copia. Poderíamos seguir así ate o ano 2007, os asuntos en materia económica solicitados foron contestados todos neste lexislatura, dende o 2007, e están sendo contestados a día de hoxe, por tanto lle pediría que me informara de cales son esas facturas e eses datos económicos aos que vostedes non tiveron acceso e aos que o goberno municipal lles puxo atrancos.

Nesta moción do grupo municipal popular o que se da a entender é que teñen serios atrancos para o acceso á información e que non se lles fai chegar toda a información que solicitan, e iso non é certo, porque se lles facilita a información que é requirida.

O departamento de intervención facilita a información, tal e como acaban vostedes de ler, como indica o Real Decreto lexislativo 2/2004 “A intervención da entidade local remitirá ao pleno da entidade por conduto da presidencia información da execución dos prazos do orzamento e os movementos de tesouraría nos prazos e coa periodicidade que o pleno estableza” Por tanto o remite a intervención municipal, e o remite ao pleno, non o remite o goberno, e se remite cos prazos e a periodicidade que establece o pleno, así que non se pode dicir dados os incalculables atrancos que padecen vostedes por parte do goberno municipal para acceder á información, non se pode dicir que ese é motivo para solicitar isto agora neste pleno, porque esta solicitude de información a ten que facer este pleno ao departamento de intervención, que é o responsable de elaborar esta información. Xa queda demostrado sobradamente que o que se propón é que sexan os servizos económicos os que remitan trimestralmente esta información e nos prazos que vostedes propuxeron. Por parte do goberno municipal non vai haber inconveniente ningún en que o departamento de intervención remita esa información, porque así o ten que facer. Ademais non existen inconvenientes porque, como faláron os compañeiros do grupo municipal do BNG, existe un informe da intervención municipal que di que non hai impedimento de ningún tipo para facilitar esta información ao pleno, o que si vai ocorrer é que suporá unha sobrecarga de traballo no departamento, tendo en conta todo o traballo diario que ten en canto á formación e rendición das contas xerais deste concello.



O goberno municipal apoia esta moción, pero non apoia a exposición de motivos na que vostedes fan afirmacións falsas, tendenciosas e maliciosas. Cremos que isto é unha proba mais do pouco experimentados que se mostran dende o grupo popular. Ten que quedar claro que esta proposta é de competencia plenaria e que non existe problema por parte do goberno municipal en apoiala. Apoiamos a moción pero non apoiamos a exposición de motivos.

O señor alcalde abre unha segunda quenda de intervencións, intervindo o voceiro do grupo municipal popular don **Santiago Amor Barreiro** que di: O goberno apoia isto, que é o cumprimento da normativa. Nós solicitamos información, temos un AZ parecido a ese que ten a concelleira, coas cuestións que aínda están sen responder e que moitas veces temos plantexado nos plenos como preguntas, porque vostedes contestan, iso é certo, pero non entran no fondo do asunto á hora de contestar, e moitas veces na comisión informativa e aquí no pleno hai que sacarles con sacacorchos a información económica. Falou vostede dun escrito no que solicitamos información sobre a variante que se pretende facer entre Sigüeiro e Padrón, e tanto tardaron vostedes en contestar, porque parece que non había unha regrabadora de Cds no concello para facernos unha copia, que uns compañeiros do PP en Teo nos facilitaron a copia. Nós temos un ordenador na nosa oficina municipal que ten regrabadora, veñan vostedes alí a facelo. Xa despois de moito tempo nos deron contestación a esa petición. Falan de que contestan, de que dan a información, e aínda estamos esperando por esa relación de facturas sobre o asesor xurídico externo deste concello, a aínda temos pendentes que nos faciliten os apuntes contables daqueles pagos a XXXXX de principios de ano, non pode mentir vostede, porque sabe que moitas veces solicitamos nas comisións informativas información de índole económica e por escrito e non dan esa información, e sabe que temos ido ao departamento de intervención e a señora interventora nos ten dito que esa información a ten vostede, e despois a entrega sesgada e non nos entrega a información detallada, como a débeda con Urbaser e a débeda coa Mancomunidade Serra do Barbanza. Os traballadores de intervención fan o seu traballo, pero o que queda claro é que outra cousa é o que vostedes contestan.

E non diga vostede que suporá mais carga de traballo para os departamentos económicos, pode ser un pouco mais, pero a señora interventora dixo que era sinxelo de facer coa informática, así que non será mais carga de traballo. Se vostedes van apoiar isto, agradecemos que apoiem o cumprimento da normativa sobre remitir ao pleno a información económica, pero non tenten enmascarar e enganar dicindo que mentimos e que somos receptores da información, porque saben que non é así.

Intervén a concelleira de Economía e Facenda dona **Patricia Conde Lois** para dicir que en primeiro lugar non admite afirmacións como a que fixo o voceiro popular de que dende a concellaría se emite información sesgada, pedíndolle que aclare iso.

Intervén o voceiro do grupo municipal popular don **Santiago Amor Barreiro** para dicir: Remítanos os informes tal e como lle veñen de intervención.

Toma a palabra o señor **alcalde** para chamar a atención ao señor **Amor** dicíndolle que non está no uso da palabra e que manteña silencio, que agarde á súa quenda.

Continúa a señora **concelleira**: ¿vostede que está insinuando, que eu cambio os informes dun técnico de intervención? Que conste en acta o que está dicindo o señor Amor, porque non é certo, que o demostre, porque iso é unha mentira absoluta. Fala de que non lle damos a información económica, pois traia vostede un listado de cal é a información que non lle facilitamos nas comisións. Fala das facturas de XXXXX.

Toma de novo a palabra o señor **alcalde** para chamar á orde ao señor Amor dicindo: Señor Amor, non ten vostede a palabra, son preguntas retóricas, tranquilícese. É a segunda ocasión que lle chamo a atención, á terceira vai fóra.

Continúa a **concelleira**: Vostede di que non damos a información económica, traia ao próximo pleno cal é esa información económica que non se facilita. Respecto das facturas de XXXXX saiba vostede que recentemente se recibiu na intervención municipal esa información e se vai trasladar en breve, entre mañá e o luns terá vostede esa información, porque nunca se lle negou. En segundo lugar, fala da solicitude que fixeron de copia do CD que contén o estudo da estrada alternativa á nacional 550 planificada polo Ministerio de Fomento entre Sigüeiro e Padrón ¿como poden dicir que foron a outro concello? vostedes fan esa solicitude o 16 de xuño de 2010 e o 18 de xuño de 2010 , con rexistro de saída 5694 e cun acuse de recibo de 18 de xuño, se lles di *Con data 16 de xuño de 2010 e nº de rexistro de entrada 13830 solicita copia de CD (...) Realizadas as actuacións oportunas polo servizo municipal de informática, adxunto se lle remite en soporte dixital a documentación solicitada.* Dous días despois.

Intervén o señor **alcalde** novamente para dicir ao Señor Amor que non ten o uso da palabra.

Continúa dicindo a **concelleira** dona **Patricia Conde Lois**: ¿Vostede recibiu a información ou non? Si ¿verdade? hai un acuse de recibo asinado. E respecto dos apuntes contables a XXXXX, vostede mesmo nun pleno ensinou unha copia deses apuntes.

Toma a palabra o señor **alcalde**, que di: Señor Amor, non ten a palabra ¡silencio! Vostede está provocando a esta Alcaldía para que o teña que poñer fóra, non ten o uso da palabra ¡silencio, señor Amor! Está vostede expulsado do pleno, retírese. Levántase a sesión, señoras e señores, boas noites, que conste en acta que o motivo de levantar a sesión é a indisciplina do voceiro do grupo municipal popular don Santiago Amor Barreiro negándose a retirarse voluntariamente do salón de sesións tras ser expulsado pola alcaldía.

O señor alcalde presidente dou por rematado o acto e levantou a sesión ás vinte e unha horas e corenta minutos do día 1 de xullo de 2010, de todo o que eu como secretaria certifico.

Vº Prace

A secretaria

O alcalde